



**Winterheil (Sommerheil)|| Der Kleinen Catho-||lischen  
Postill/ Jacobi || Feuchthij/ Weyhbischoffs|| zu Bamberg/  
der H.|| Schrift D.||**

Darin[n]en kürztlich vn[d] Catholisch/|| alle Sontägliche Fest vn[d]  
Feyrtägliche|| Euangelien ...

**Feucht, Jakob**

**Cöln, M.D.XCV.**

**VD16 F 850**

Am Feyertag des H. Apostels vnd Euangelisten Matthei.

---

[urn:nbn:de:hbz:466:1-61414](https://nbn-resolving.org/urn:nbn:de:hbz:466:1-61414)

wie es Christus getragen hat/ kont aber nit fort  
gehn/ biß daß er/ auß rath Zacharie des Hieroso-  
lymischen Bischoues/ seine Sighafftige kleider  
aufzoge/ auch barfuß vnd demütig daher gieng.  
Richtet dasselbig am Berg Caluarix auff/ do  
hin es von Helena zuuor gesetzt ward zc.

**E** Vangelium vnd Predigt/ wie an  
der Erfindung des H. Creuzes/  
nämlich am dritten tag Maij ge-  
setzt.

Am Feyertag des H. Apostels  
vnd Euangelisten Matthei/ Euan-  
gelium Matth. ix.

Am 21. tag  
Septemb.

Mar. 2. 6  
Luc. 5. 15. a

**I**n der zeit sahe IESVS  
einen Menschen am Zol-  
siken/ der hieß mit na-  
men Mattheus/ vnd  
sprach zu ihm: Folge  
mir nach. Vnd er stundt  
auff/ vnd volgete ihm. Vnd es begab sich/  
do er zu tisch saß im hauß/ sihe/ da kamen  
vil Publicanen vnd Sünder/ vnd sassen zu  
tisch mit IESV vñ seinen Jüngern. Vnd  
do das sahen die Phariseeer/ sprachen sie zu  
seinen Jüngern: Warumb isset ewer Mei-  
ster mit den Publicanen vnd Sündern?  
Do das IESVS höret/ sprach er zu ihnen:  
Die gesunden dürffen nit des Arkes/ son-  
der





der die Krancken. Gehet aber hin/ vnd lernet was das sey/ Ich wil barmherzigkeit/ vnd nit Opffer. Dann ich binn nit kommen zu beruffen die Gerechten/ sonder die Sünder.

Osee 6.6  
Matth. 12.9  
1. Tim. 1.6

Vnd er stundte auff/ vnd volgete ihm. Matth. ix.

**A**lle die jenigen Christen/ so jemaln wider GOTT gehandelt/ oder noch mitler zeit sündigen werden/ haben auff heut ein tröstlichs Euangelium der Sünden widerumb ledig vnd des Ewigen lebens theilhaftig zu werden. Mattheus der heilig Apostel vnd Euangelist bezeugt von sich selbst/ nennet sich auch selbst mit seinem eignen Namen/ vnd

a 2 spricht/



spricht/ daß er seye am Zoll gefessen. Damit er anzeigen vnd bekennen wil/ daß er ein großer Sünder gewesen seye/ seitemaln solche Anpöhl ohne liegen vnd berriegen schwärlich abgehn. Lehret auch fürs ander/ daß er auß einem Zöllner ein Apostel/ auß einem Sünder ein Pfaffen/ auß einem vnfrummen frumb/ auß einem Weltkind ein kind GOTTES vnd der Ewigen Seligkeit wordē sey. Beschreibe auch mit vleis wie solchs geschehen sey.

Teilung  
vnd Inhalt  
diser Predig.

Auff daß nun auch wir Christen vns hierinnen zur zeit der not zu verhalten wissen/ wollen wir gehörtes Euangelium/ vñ was sich zwischen Christo vnd Mattheo verlossen/ etwas vleissigers erwegen. Auff daß aber solchs desto richtiger von mir verrichtet/ vnd desto ordentlicher von euch vernommen mög werden/ wollen wir dise Predig auch in zween Theil abtheilen: Vnd im ersten von der Person Christi/ Im andern von der Person Matthei handeln/ Vnd was wir von jedem zu lernen/ mercken vnd behalten haben/ fürzlich vnd auff das leichtest gern vnd gutwillig fürtragen/ welchs auch ihr gedultig anhören wölt.

Matth. 9.  
Mar. 2.  
Luc. 5.

**D**er heilig Euangelist vnd Apostel Christi Mattheus/ desse Fest oder Feyertag wir Catholische Christen auff heut halten/ hat vns gehörtes Euangelium neben den Euangelisten Marco vnd Luca selbst beschriben/ vnd vor dem anfang desselbigen lehret: Wie daß der Herr Christus vom lād der Gerasener herüber gefaren/ vnd in sein Stadt/  
nemlich



nemlich gen Capharnaum/kömen sey/ alda vnd  
 als bald haben sie einen Sichtbrüchigen/ so im  
 Beth gelegen/ für ihne gebracht/ welchen er an  
 leib vnd Seel mit einem wort gesundt gemacht/  
 auch auff das murmeln der Schriftgelehrten  
 ihne sterck vnd krafft geben/ das Beth auff sei-  
 nen rucken nehmen vñ heim zetrage. Vñ hierauff  
 volget diß heutig Euangelium also: In der zeit/  
 nemlich an einem Montag/ welcher der neunte  
 tag Julij im ein vñ dreissigsten Jar Christi war/  
 als d' Herr von dannen auß dem Haus dar-  
 innen er den Sichtbrüchigen/ so oben zum dach  
 hinab gelassen ist worden/ gesundt gemacht hett/  
 fürbaß gieng/ widerumb gegen dem Galilei-  
 schē Meer/sahē IESVS einen Menschē am  
 Zol sitzen/der hieß mit Namen Mattheus.  
 Diser Mattheus ist der jenig/ daruon wir auff  
 heut handeln/ desse Fest wir auff heut halten/  
 der diß Euangelium selbst geschriben/ der ein  
 Apostel vnd H. Euangelist worden ist. Als  
 Marcus vnd Lucas diß heutig Euangelium  
 vnd Euangelische Histori beschriben haben/ Mattheus  
 nenneten sie disen Zolner mit seinem andern wirdt auch  
 Namen/ Leui: Seitēmaln er ein grosser Sün- genennet  
 der vnd Schinder gewesen ist/ wöllen sie seines Leui.  
 Namens/ mit welchem er immer/ als ein Jün-  
 ger des Herren worden/ genennet/ verscho-  
 nen. Er aber/ Mattheus/ thut wie einem rech-  
 ten Puffer von nöten/ als der sich weder vor Der sentg  
 GOTT noch vor der Welt zu sündigen nit ge- so sich nit  
 forchten/der soll vnd will sich auch zu Puffen/sein fürchtet zu  
 Sünd sündigē/ soll



sich auch zu  
Püssen nit  
schämen.

Ein schlech-  
tes ämptlin  
kan einen  
Dieb erneh-  
ren.

Sünd bekennen/ vnd seinen Namen öffentlich  
nennen nit schämen. Diser Mattheus/ wurde  
von allen Jüden/ ja von allen Menschen/ vnd  
fürnemlich von den Phariseern/ verdecktlich  
vnd verechlich/ vnd ja als ein solcher Mensch  
samt allen andern Zöllnern/ gehalten/ der ihnen  
nit früb vñ gut genug seyn solt/ daß sie mit ihm  
sonderliche gemeinschaft haben/ mit ihm weder  
essen noch trincken/ weder handlen noch wan-  
deln solten/ darumb/ er war ein Zöllner/ vnd ein  
solcher Mensch/ so dem vngleubigē Heydnischen  
Römischen Keyser/ einer frembden Obrigkeit/  
vom volck GOTTES den Zol eyngebracht hat.  
Darumb auch/ daß solche Gesellen (vil vnder  
ihnē) nit weniger sonder nur mehr Zol fordern/  
begeren vnd eynnemen/ dann ihnen beuolhen/  
dann Göttlich/billich vñ recht ist/ auff daß/ wann  
sie vom Zoll abgeschafft werden/ eigne Heuser  
kauffen vnd noch grössere Bucherer vñ Schin-  
der werden könden/ Davon mehrmaln die Ob-  
rizkeit nit vil weißt/ aber die armen Brüdertö-  
nen/ so zu fuß/ Ross oder gefaren für solche Zöl-  
heuser reisen müssen/ erfarens mehrmaln nit  
zu vil/ wie man dann in gemeinem Sprichwort  
sagt: Es muß ein schlechtes ämptlin seyn/ (do  
man solchs mißbrauchen wil) das nit heckens  
werth ist/ wie dann zu zeiten/ wann die Herren  
ihre augen ein mal recht auffthund/ vnd die  
Schinderey ihrer Zöllner vnd anderer derglei-  
chen Gesellen mercken/ ihnen ein anders Zöl-  
haus gebawet wirdt/ alda der Wind die glocken  
jeczund hin/ bald hieher wehet.



Als der Herr Mattheum gesehen/ vnd gewist  
 daß er auch nach gemeiner art der Zölner (doch  
 findet man wol zu zeiten auch frumme Zölner)  
 ein Sünder vnd Schinder sey/ künde vnd möge  
 doch also in disen Sünden vnd Schinderey nit  
 Selig werdē/ sprach er zu ihme: Folge mir  
 nach/ vnd stehe ab von diser Schinderey/  
 Dann also kanstu nit selig werden. Wie mu-  
 ste dann Mattheus Christo dem Herren nach-  
 uolgē? Erstlich must er vom Zol auffstehn/ das  
 selbig Ampt vbergeben/ nit mehr am Zol sitzen/  
 keinen Zol mehr weder eynnehmen noch verrech-  
 nen/ niemands mehr mit dem Zol vbernehmen/  
 nichts vnbillichs mehr weder durch liegen noch  
 betriegen eynnehmen. Zum andern must er/ wie  
 Zacheus/ alles vnbillichs bekommen Gelt auff  
 dem Zol vnd sonsten widerumb erstatten den je-  
 nigē welchen er solchs wider billigkeit abgenom-  
 men hat/ oder sonsten Armen leuten geben/ vnd  
 kein frembdes Gut behalten. Zum dritten solte  
 er ihme mit den füßen vnd ganken leib hin vnd  
 wider im Jüdischen vnd Galileischen land nach-  
 volgen/ sein Jünger vnd Apostel werden. Wie  
 sich nun gemelter Mattheus hierinnen verhal-  
 ten/ wöllen wir im andern Theil diser Predig  
 lehren vnd hören.

Auß diser berufung Matthei lernē wir Chri-  
 sten die grossen ja höchstē Barmherzigkeit Chri-  
 sti IESU vnseres Heilands/ so er zu Mattheo ge-  
 habt/ auff daß er nit verdampft sonder Selig  
 würde. Der gute Mattheus stecket albereit so  
 tieff/ ja bis vber die ohren/ in der Sünd/ hieltē

Der Herr  
 Christus zu  
 allen Sün-  
 dern.

Wie Mat-  
 theus Chri-  
 sto nachvol-  
 gen must.

Grosse  
 Barmher-  
 zigkeit Chri-  
 sti gegen al-  
 len Sün-  
 dern.

a A 3 Sünd



Ezech. 18. 33.

Sünd nit mehr für Sünd/vermeynt nit daß er ein Sünder were noch also verdampft würde/ sündiget vnd schindet derhalben immer wie lang er je mehr/ wie mehr je hefftiger/ were auch also in seiner Sünd vnd Wucher gestorben vnd verdorben. Christus aber vnser lieber Herr/welcher nit begert den tod des Sünders/sonder daß er sich bekere vnd habe das Ewig leben/der ruffet ihne zu sich/ er solle Puff thun/ frumb vnd volgends selig werden/ welchs ja die höchste gütigkeit vnd Barmherzigkeit Christi seyn muß.

Alle Sünd  
will Chri-  
stus gern  
auffnehmen.

Es soll aber euwer andacht nit vermeynen/ daß er Christus/nur Mattheum also von seiner Sünd zur frumbkeit/vom Zol zur Puff/von der Verdammuß zur Seligkeit beruffen habe/ Daß er allein Mattheum so lieb gehabt vnd so willig zur Puff vnd zu einem Erben der Seligkeit auffgenommen habe. Nein. Wie er sich auff heutt Mattheo erzeigt hat/ also wirdt er sich auch gegen allen Sündern auff der gansen Welt/ so vor vnd nach Mattheo gelebt haben/ verhalten/ so ferr sie auch ihme mit Mattheo nachvolgen. Welchs ja einem jeden leichtlich auß disen worten Christi zu lernen ist/ do er im heuttigen Euangelio zu den Phariseern also sagt: Dann ich bin nit kommen zu beruffen die Gerechten/ sonder die Sünder zur Puff. Darauff ja zu lernen/ sprich ich/ daß er Christus nit kommen nur wegen eines Sünders/als des Matthei/ sonder wegen aller Sünder/ so je gelebt/ noch leben/ vnd bis zum Jüngsten tag leben werden.



werden. Alle Sünder hat er beruffen/berufft sie  
 noch/wirdt sie biß zum Jüngsten tag beruffen:  
 alle Sünder will er gern an vnd auffnehmen/  
 allen Sündern will er gern (wann sie nur selb-  
 sten wollen) alle ihre Sünd verzeihen/nit mehr  
 gedencen/vnd das Ewig leben schencken. Zu al-  
 len Sündern/ ja zu allen Menschen auff Er-  
 den/spricht Christus der Herr: Kompt her zu Matth. 11.  
 mir alle die ihr beladen vnd (mit sünden auch  
 anderer trübseligkeit) beschweret sendt/ ich wil  
 euch erquickten. Keret euch zu mir/ so würde ich Malach. 3.  
 zu euch gekert werden. Des Menschen Sohn Luc. 19.  
 ist kommen zu suchen vnd selig machen/ das/ so  
 verloren war. Wo sich der vngerecht von allen Ezech. 18.  
 seinen sünden bekert vnd thut Puff die er began-  
 gen hat/ so will ich aller seiner vngerechtigkeit  
 nit mehr gedencen. So wahr ich lebe/spricht der Ezech. 33.  
 Herre GOTT/ so wahr habe ich keinen wolge-  
 fallen an des Gottlosen tod/ sonder daß sich der  
 Gottlose von seinem wege bekere/thue Puff/ vñ  
 lebe. Wann sich/spricht GOTT der Allmechtig/ Jere. 18.  
 diß Volck bekeret von seiner Bosheit vnd thut  
 Puff/ so will ich auch New haben vber das Un-  
 glück das ich ihnen gedacht zu thun. Waschet Esa. 1.  
 euch/reiniget euch/ thut euwere böse gedancken  
 von meinen augen/ lasset abe vbels zu thun/ ler-  
 net gutes thun ic. Wann euwere Sünd gleich  
 blutrot weren/ sollen sie doch Schneeweiß wer-  
 den: vnd wann sie gleich Rosinfarb weren/sollen  
 sie doch wie wille weiß werden ic.

Diser vnd dergleichen Göttliche vñ herrliche  
 verheissungen GOTTES/habē wir gar vil im alten

a 4 vnd



vnd neuwen Testament/ darinnen er allen vnd jeden Sündern mit außdrucklichen Worten versprochen/ sie/ nit weniger als Mattheum/ zu welcher zeit vnd stund sie wollen/ zur Puff vnd Seligkeit auffzunehmen/ welchs ja ein vnaußsprechliche Liebe vnd höchste Barmherzigkeit GOTTES gegen vns armen Sündern seyn muß. Dann da GOTT nit nach seiner Barmherzigkeit/ sonder iñner/ wie wir dann verschulden/ nach seiner Gerechtigkeit/ nach erforschung vnser Sünden/ sich gegen vns verhalten wolt/ hilff lieber GOTT hilff/ wie wurden wir Menschen alle also vbel bestehn/ kaum der zehende Mensch wurde Selig werden/ ja vnder hundert nit zween oder drey/ vnd beuorauß jegund zu diser zeit/ alda der Teufel gar ledig/ vnd sich niemands mehr zu sündigen schamet noch fürchtet/ wie leider vor augen vnd der ganken Welt bewust/ in was/ wie vil vnd welcherley Sündschand vñ laster die Geistlichen vnd Weltlichen/ Obrigkeit vnd Vnderthonen/ Edel vnd Vnedel/ Fraw vnd Mann/ jung vnd alte diser zeit bis vber die ohren stecken/ mehrmalt darinnen sterben vnd verderbē. Diser ist mit Mattheo ein Zolner. Ein anderer mit Zacheo ein Bucherer. Der dritte mit Juda ein Dieb/ mit Gesma ein Mörder/ mit Dauid ein Ehbrecher vnd Todtschleger/ mit Petro ein verleugner Christi/ mit Magdalena ein vnkeuscher/ mit andern ein anderer Sünder: vnd als nit zu zweifeln/ seynd diser zeit vil vil leut/ so doch gute Christen vnd zwar etwan Catholische Christen seyn

Gott hand-  
let mit vns  
nach seiner  
Barmher-  
zigkeit.

Sündige  
Welt diser  
zeit.

Nächerley  
Sünd vnd  
Sünder.



seyen wollen/zu finden/so etwann grössere vnd zehen mal grössere Sünder seyend/ dan eben Mattheus/ Zacheus/vñ andere obgemelte/derhalben ihnē auch nit weniger als den jenigē ein Barmherziger GOTT vnd Gnediger Vatter von nöten ist.

Allen ist ein Barmherziger Gott von nöten.

Nun ist es aber zur Verzeihung der Sünden vnd erlangung des Ewigen lebens nit genug/ das wir wissen/ Das wir Sünder seyend: ist auch nit genug/ das wir wissen/ Das GOTT vns allen zur Pusz ruffet/ das er vns gern an vnd aufnehmen/ vnser Sünd verzeihen/ vnd selig machen wil: Sonder wir müssen auch von Mattheo lernen/ wie wir vns in der Sünd vnd solcher beruffung GOTTEs verhalte sollen. Wöllen derhalben jekund von der Person Matthei handeln/ vnd sehen/ was wir von ihme zu lernen haben.

**W**ie sich Mattheus der Zölner auff die beruffung Christi/ so zu ihme geschehen/ verhalten habe/ bezeugt er von sich selbst also: Vnd er stundte auff/ vnd volgete ihme. Gleich wie diser Mattheus erstlich ein grosser Sünder/ vñ im stand des zeitlichen ja vil mehr des Ewigen verderbens gewesen ist/ also ist er bald hernach ein fürtrefflicher Puffer vnd ein kind der Ewigen Seligkeit worden/ Darumb/ Er ist dem Herren auff sein begeren nachgeuolget/ vnd zwar also/ wie recht vnd von nöten gewesen ist.

Er ist ihme nachgeuolget mit dem Leib/ Gut/  
a A s Gemüt/



Wie Mat-  
theus Chri-  
sto nachge-  
uolget.

Mar. 2.  
Luc. 5.

Sich fröh-  
der Sünd  
theilhaftig  
machen.

Von S.  
Mattheo.

Gemüt/ Mund/ Herzen/ Worten vnd Wer-  
cken. Erstlich ist er auffgestanden/ nemlich vom  
Zol/ von der Sünd/ hat das Zolampyt vbergebē/  
zu Sündigen vnd Schinden auffgehört/ die leut  
nit mehr weder betrogē noch vbernommen/ sich  
als einen Sünder vnd betrieglichen Zolner er-  
kennt/ von der Sünd abgestanden/ Rew vñ leid  
darüber gehabt so vil von nöten vnd ihme mög-  
lich war/ welchs leichtlich auß deme zu lernen:  
Das er domaln/ als Marcus vnd Lucas bezeugen/  
in seinem hauß dem Herren ein Malzeit hat  
bereiten lassen/ dazu er auch andere Sünder vnd  
Zolner geladen/ ohne zweifel darumb/ daß auch  
sie nach seinem Exempel von der Sünd abstehn  
vnd frumb werden solten.

Es ist auch nit zu zweifeln/ sonder zu glauben:  
Das Mattheus/ wie Zacheus/ das vnbillich be-  
kommen Gelt vnd Gut alles widerumb geben/  
vnd nichts behalten/ dann nur was billich sein  
gewesen ist: sonst were ihme die Sünd nit al-  
lein nit verziehen worden/ sonder Christus der  
Herr hette auch mit ihme die Malzeit vom fröh-  
den Gut nit eyngenommen/ Dann wer sich wis-  
siglich frembdes vnd vnbillichs Guts theilhaff-  
tig machet/ der wirdt auch derselbigen Sünd  
theilhafftig. So ist solchs auch hierauf leicht-  
lich abzunehmen/ daß er (fürs dritte) alles/  
hauß vnd hof vnd was er gehabt/ verlassen/ vnd  
Christo nachgeuolget ist im land Galilea/ Ju-  
dea/ vnd nach seiner/ nemlich Christi Himmel-  
fart in Echiopiam/ alda er das Euangelium  
Christi drey vnd dreissig Jar geprediget/ den  
König



König Egyptum/auch die Königin sampt dem ganken Land/zu Christo bekeret: bauwet vil kyrchen/ordiniert vil Priester vnd Diacon/weyhet auch des Königs Tochter Iphigeniam Christo zu einer Junckfrawen. Da aber der König starb/regiret Hirtacus an seiner statt/vnd begeret Iphigeniam zum Weib/zu welchem der H. Apostel öffentlich sprach: Er könne ihme ein Braut die Christo vermehlet were/nit vererblichen. Darumb/als er Mess gehalten/vñ am Altar mit außgestreckten Armen bettet/ließ ihn derselbig König hinderwerts erstechen/vnd ist der H. Mattheus also ritterlich vñ Christlich gestorben vnd Selig worden.

Wollen wir Christē vns nun den erstē Theil diser Predig zu nutz machen vnd geniessen/Daß GOTT noch auff den heutigen tag/vns vnd allen Sündern ihre Sünd zu verzeihen/nit weniger als dem heutigen Mattheo geneigt seye/so müssen wir auch in disem andern Theil mercken/ behalten vnd in das werck richten/das jenig/so er Mattheus auff die beruffung für die hand genommen/gern vnd gutwillig/vnd so vil von nöten/ins werck gerichtet hat.

Erstlich müssen alle Sünder Christo volgen/Sünder sol-  
 seitmaln alle/wie droben gehört/von vnd zu ih-len Christo  
 me beruffen seynd/vnd noch täglich berufft wer-folgen.  
 den durch inwendige eyngebung des H. Geistes/  
 durch die H. Schrift / durch die Catholischen  
 Prediger. Müssen aber anfänglich also nach-Von der  
 volgen: Daß sie auch/wie Mattheus/von der Sünd ab-  
 Sünd auffstehn vñ dieselben gantzlich verlassen/stehn.  
 nit



nit heut/morgen/einen andern tag oder Jar  
eben dieselbige oder ein andere Sünd widerumb  
begehñ wöllen/wie man zu zeiten leut findet/die  
auch Püssen/Beichten vnd zum heiligen Sa-  
crament des Altars gehñ/wöllen aber doch von  
ihren Sünden so sie geübt/vnd auch (ihres er-  
achtens) gebeicht haben/nit absteñ/sonder als  
bald nach der Beicht vnd niessung des H. Sa-  
craments widerumb in die altē fußstapffen tret-  
ten/vnd nit weniger als zu vor sündigen. Dises  
nachuolgen ist nichts nutz/dise Puß ist vmb son-  
sten/dise Beicht ist vergebens/also wirdt das H.  
Sacrament vnwürdig vnd zur verderbung emp-  
fangen. Ein solcher Mensch/oder Mundchriß/  
betriegt nit weder GOTT noch den Priester/  
wie er fälschlich vermeynt/sonder sich selbst.  
Der Priester kan ihme in sein falsches vnd be-  
trüglichs Herz nit sehen/er vrtheilet ihne nach  
seinen worten/vermeynt vnd weißt nit anderst  
dann ihme seye also wie er gebeichtet hat. Dann  
der Priester ist nit GOTT/sonder ein Mensch/  
vnd erkennet nit das Herz vnd gedanken der  
Menschen: wie ihme der Sünder Beichtet/also  
spricht er ihme die Absolution. GOTT aber der  
höret nit allein die Beicht/sonder weißt auch  
das Herz vnd fürnemen des Sünders/der  
wirdt ihme widergelten nach deme er würdig ist.  
Es were ja Mattheo sein nachuolung Chri-  
sto dem Herren nichts nutz gewesen/wann er  
von seinem Zolampt/Finantz/liegen/betriegem  
vnd Wucher nit hett wöllen absteñ. Nichts  
hette Petrum vnd Magdalenam ihr bitterlichs  
weinen

Vergebens-  
lichs nach-  
uolgen.

Priester  
seynd nit  
Gott.

Gott ist alle  
ding bewusst.



weinen geholfen noch zur Seligkeit genuket/  
wann sie noch forthin Christum verleugnē vnd  
vnzucht hetten treiben wöllen. Warumb wolt  
man einem Dieb sein leben fristen vnd des Gal-  
gens entlassen/ der mit dem Mund bekennet er  
habe rew vnd leid vber seine Sünd/ aber doch  
wölle er forthin zu stelen nit ablassen? Ein solche  
Obrikeit wurd nit Barmherzig sonder ein vr-  
sach ferners Diebstals vñ verderbens viler leut  
seyn. Vnd gründlich dauon zu reden/ so ist ein  
solche Puff/ do jemāds von der Sünd abgestehn  
nit bedacht ist/ kein Puff/ ein solche Rew vnd  
Beicht ist kein Rew noch Beicht. Der halben so  
muß erstlich vnd vor allendingen der Sünder  
auffstehn von der Sünd/ dieselbige verlassen/ wi-  
derumb zu begehn nit bedacht seyn/ alle Sünde  
meiden vnd als den Teufel selbstē fliehē: frumb  
werden/ vnd/ so vil menschlich vnd möglich ist/  
frumb/Gottsförchtig/andechtig bleibē: GOTT  
forthin mit allerley Gottesdienst/ guten vban-  
gen/ guten Wercken/ würdigen Früchten der  
Puff gern vnd willig dienen.

Fürs ander/ Wann nun der Sünder von al-  
len Sünden abgestehn eigentlich entschlossen/ Matt. 16. 18.  
solche GOTT vnd dem Priester/welchem Chri- Joan. 20.  
stus die Sünden zu binden vnd lösen gewalt ge-  
ben/ mündlich vnd außtruckentlich/ vnd so vil  
möglich vollkommenlich gebeichtet hat/ muß er Dabillichs  
bedacht seyn vnd ohne verzug ins werck richten/ Gut muß  
nemlich/widerumb zu geben alles das jenig Gelt man wider-  
vnd Gut (so vil in seinem vermögen) so er mit lie- um geben.  
gen/betriegem/Wucher/ Stelen/rauben/ vnbil-  
lich



lich kauffen/ verkauffen/ böse erbschafft/ oder  
sonsten nit mit GOTT noch mit ehren bekommen  
hat: vnd wie lang solchs nit geschicht/ noch zu  
geschehen eigentlich entschlossen ist/ vnd doch  
noch dasselbig oder so vil vorhanden/ist die nach-  
uolgunz/ die Pusz/ Reu vnd Beicht vmb son-  
sten vnd vergebens. Es ist nit gnug/ nit mehr ste-  
len wollen/ wo man den Diebstal/ so noch vor-  
handen/ nit widerumb geben will. Dis hat auch  
der Iud Zacheus wol gewist/ welcher nit ein ge-  
ringer Bucherer vnd Betrieger gewesen ist/  
derhalben saget er zu Christo: Sihe Herr/ den  
halben theil meiner Güter gibe ich den Armen/  
vñ so ich jemand betrogen hab/ das gebe ich vier-  
feltig wider. Derhalbē sprach IESVS zu ihme:  
Heut ist diesem Haus heil widerfahren zc. Wann  
von der Obrigkeit nit gestraffet/ vñ von GOTT  
gut geheissen vnd also verziehen wurde/ nemlich  
nit mehr Stelen/ aber doch den Diebstal behal-  
ten/ hilff lieber GOTT hilff/ wie wurde den Ar-  
men so vbel gehn. Die starcken vñ Reichen wur-  
den in einem Monat oder Jar so vil stelen/ rau-  
ben/ vnd sonsten durch list vnd gewalt zu wegen  
bringen/ das sie die tag ihres lebens gnug betten/  
wolten nun dasselbig behalten/ vnd nit mehr ste-  
len noch rauben. Nein/ dis ist nit weder billich/  
Rechtlich noch Göttlich. Es soll auch kein Bu-  
cherer/ noch ein anderer so frembdes vnd vnbil-  
lich bekommens Gut hat/ nit Absolutert werden/  
ob er gleich dieselbige Sünd beichtet/ so lang/  
wie lang er nit verspricht/ dasselbig alles/ oder  
so vil in seinem vermögen/ widerumb erstatten  
den

Luc. 19.

Zacheus ein  
rechter Pusz-  
ser.

Welche nit  
sollen Absol-  
utert werde.

Rechtlich noch Göttlich. Es soll auch kein Bu-  
cherer/ noch ein anderer so frembdes vnd vnbil-  
lich bekommens Gut hat/ nit Absolutert werden/  
ob er gleich dieselbige Sünd beichtet/ so lang/  
wie lang er nit verspricht/ dasselbig alles/ oder  
so vil in seinem vermögen/ widerumb erstatten  
den



den jenigen/ eintweder welchen er solchs vnbillich abgenommen/ oder ihren freunden/ oder/ do solchs nit geschehen könnte/ den Armen/ dem Gottesdienst/ oder dergleichen wol angelegten Personen oder örter dem Gottesdienst zu gutem vermennt. Vnd do jemandts seiner Seel gerathen vñ den sichersten wege gehn wil/ der gebe selbster in seinem leben solchs vnbillich Gut widerumb/ schiebe es nit auff seine Erben. Dann wir sehen wol wie die Erben mehrmahl solchem beuelch nachkommen/ wann sie nur vil Erbtheil bekommen möchten/ es hette die Seel gleich GOTT oder der Teufel/ darnach fragen sie gar wenig. Vnd diß fürs ander Pünctlin.

Ob aber/ fürs dritte/ ein Sünder/ vnd vol. **Frag.**  
 gentz alle Menschen/ so mit Mattheo begeren Selig zu werden/ auch mit ihme alles was sie haben/ hauß vnd hof/ Vatter vnd Mutter/ Brüder vnd Schwester/ Belt vnd Gut/ Wissen vnd äcker verlassen/ Christo nachfolgen/ sich eintweder in einen Geistlichen Stand/ in ein Kloster/ in ein Wüste begeben/ oder sonsten seinen Namen zu bekennen im land hin vnd her ziehen müssen/ oder ob sie alles was sie billich haben behalten/ bey hauß vnd hof/ Weib vnd Kind bleiben/ vnd dennocht selig werden mögen/ ist diß die antwort: Sich in ein Kloster begeben/ der gestalt **Antwort.**  
 alles verlassen/ ein Mönch oder Klosterfray werden/ die tag seines lebens wollen in der Wü. **Klosterlebe**  
 ste hinbringen/ ist von GOTT/ niemandts we. **jedermann**  
 der gebotten noch verbotten: einem jeden ste. **(vor dem**  
 het es frey/ solchs anzunehmen oder zelassen. **Gelübde)**  
 frey.  
 Doch



Klosterleut  
haben weni-  
ger vrsach  
zu sündigen/  
aber mehr  
gelegenheit  
Gott zu die-  
nen.

1. Cor. 7.

Die Luthere-  
rischen be-  
sen dem H.  
Paulo diß  
nächst auff.

Doch ist diß ein mal vnd alle mal gewiß: Daß die jenigen so also der Welt das Gelt/ vnd alles Gut lassen/ sich in ein Kloster begeben/ weniger gelegenheit vnd vrsach haben zu sündigen/ dann die jenigen so in der Welt leben: Sie haben auch zeit vnd weil/ gelegenheit vñ vrsach/ GOTT/ mit betten/ fasten/ wachen vnd dergleichen Christlichen vñbungen/ zu dienen/ vnd ihnen desto ein höhere kron droben im Himmel zu verdienen/ dann die jenigen so in der Welt leben/ mit zeitlichen vnd Weltlichen geschafften/ mit Weib/ Kind vnd gesind/ mühe/ arbeit/ geiß vñ Sorge beladen seynd. Wie dann der H. Paulus hieruon auch also gelehrt hat: Ich wolte gern daß ihr ohne sorg weret. Wer ohn Ehe ist/ der sorget was dem Herren angehört/ wie er dem Herren gefalle. Wer aber freyet/ der sorget was die Welt angehört/ wie er dem Weibe gefalle/ vnd ist zertheilet. Ein ledig Weib vnd ein Junckfraw/ die sorget was dem Herren angehört/ daß sie seye heilig am Leib vñ auch am Geißt: Die aber freyet/ die sorget was die Welt angehört/ vnd wie sie dem Mann gefalle. Bissher Paulus/ vnd am selbigen ort dergleichen noch mehr.

Nit/ daß jederman alles verlassen vnd sich in ein Kloster begeben müsse/ vnd sonst nit könne weder GOTT dienen noch selig werden. Nem. Man kan alles billichs behalten/ bey hauß vnd hof bleiben/ vnd dennoch GOTT dienen vnd Selig werden: aber doch/ wie gemeldet/ nit so füglich/ wie dann alle die jenigen so in der Welt seynd/ selbsten bekennen müssen. Zu deme allem müssen



müssen sich die jenigen/ so alles behalten vnd behauß vnd hof bleiben wollen/ sich diser Regel des H. Pauli gemess verhalten: Weiter ist diß die meynung/ daß die so da Weiber haben/ seyen als hetten sie keine: vnd die da weinen/ als weineten sie nit: vnd die sich freuwen/ als freuerten sie sich nit: vnd die da kauffen/ als besitzten sie es nit: vnd die diser Welt brauchen/ als brauchen sie ihr nit. *ic.* Das ist: Ein jeder soll sein haab vnd Gut/ so ihme GOTT geben/recht gebrauchen/nit mißbrauchen/vil weniger das Gelt lassen seinen Herren werden/auff daß er nit das Gelt vnd Gut lieber habe dann GOTT/vnd also das Gelt/ vnd was er hat/ seiner verdammnis ein vrsach seye. Vnd diß seye auch vom dritten Punctlin gnug gesagt/Wie man alles verlassen/ oder nit verlassen soll.

Ibidem.

Regel des  
H. Pauli/  
alle Men-  
schen betref-  
fend.

Die Gelg-  
gen seynd  
Knecht des  
Gelts.

Beschluß.

Behalten wir derhalben auß diser Predig:  
Erstlich/ Daß Christus der Herr nit allein Mattheum den Zolner oder Publicanen beruffen/ sonder auch alle andere Sünder auff den heiligen tag vnd jeder zeit. Daß er nit allein Mattheum zum Püßer gern auffgenommen/ sonder auch alle Sünder jeder zeit. Daß er nit allein Mattheo alle Sünd gern verzeihen/ sonder auch allen püßenden Sündern jeder zeit. Zum andern: Daß auch wir Sünder mit ihme/ Mattheo/ Christo dem Herren nachuolgen/ von allen Sünden abstehn/ die Sünden bekennen/ alles vnbillichs bekommen Gut widerumb geben/ alles im Werck verlassen/ oder doch also besitzten/ als besitzten wir nichts/ auff daß wir vom zeitli-

b B chen



chen zum Ewigen nit verhindert vnd also selig  
werden/ Amen.

Gebetlin  
zu Christo.

**A**l Bermal sehen vnd bekennen wir/ O  
Herr IESV Christ/ wahr seyn das  
jenig so du durch den Propheten vom  
Vatter/ dir/ vnd dem heiligen Geiſt hast  
verkündigen lassen: So wahr ich lebe/ so  
wahr hab ich kein wolgefallē an des Gott-  
losen tod/ sonder das sich der Gottlose von  
seinem wege bekere / thue Puff/ vnd lebe.  
Dann du je nit hast sehen noch leiden mö-  
gen/ das Mattheus ein Zolner solle sterbē/  
vñ also immer auch Ewig verderben/ son-  
der gesagt hast zu ihme: Folge mir nach.  
O Herr vñ Heiland/ der du auch noch auff  
den heutigen tag vñ jeder zeit alle Sünder  
zu dir rießest/ vnd gern/ wann sie nur selbst  
wollen/ selig machen wilt/ verleihe vns  
armen Sündern verstand vñ Gnad/ das  
wir dir mit Mattheo nachuolgen/ von al-  
len Sünden abstehn/ alles vnbillichs Gut  
widerumb geben/ vnd das ander alles also  
verlassen oder gebrauchen mögen/ das vns  
in die Ewige Seligkeit zu kommen nichts  
verhindere/ sonder/ so bald sich Leib vnd  
Seel scheiden/ wir mit Mat-  
theo Selig werden mö-  
gen/ Amen.

Am